



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : SHA TIN GOVERNMENT SECONDARY SCHOOL

學校名稱 : 沙田官立中學

Name of Play 劇名 : 笑話學會

Script writer 劇作者 : 朱健滔老師

Synopsis 故事大綱 :

笑話學會一直是備受注目的人氣學會，可是今年，大家發現主席朱利安的笑話大不如前、大失水準、大錯特錯，學會人氣直插谷底。力挽狂瀾的副主席阿 Law 和兩樂發現相當有嫌疑的「全國笑話大賽」可能是翻身的唯一契機.....



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Scene 1

(笑話學會 meeting 1)

(兩張長櫈，部分同學已就座，A, B 站中間)

熒幕： 面試者 4 [Thomas]講笑話，罐頭笑聲，面試者 4 到長櫈就座)

(燈亮)

A 恭喜在座咁多各位同學入選本年度笑話學會，今年嘅競爭可以話係有史以嚟咁激烈，平均七個同學爭一個名額，可以話仲難過入大學。

B 不過唔理你哋係冷面笑匠，笑面笑匠，你哋心知肚明，你哋嘅共同目標，就係坐喺咁近嘅距離，一睹我哋偉大主席嘅風采。無論你自認幾搞笑都好，喺我哋偉大主席面前，你都只不過係一個嬰兒。

A 含住個奶嘴。

B 嘅塑膠原料。

A 上面寫住嘅 Made in China。

B 中間嗰粒 in 字。

A 係一個 preposition。

B 一個無關痛癢嘅 preposition。

A 會唔會深咗少少？

眾 會。

A 話畀姐姐知道，你哋最想見嘅偶像係邊個啊？

眾 朱利安！朱利安！

(朱利安笑聲)

A 咦，佢好似嚟緊喇。

(眾肅立，期待目光，朱利安笑著進場，讀著英文報紙，朱利安站好，二女指示眾)



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

坐)

朱利安 (笑) 喂呢個堅好笑喎，成個火車站沉咗落地底，局長開記者會，然後講咗一句「我哋係唔會評論個別事件」就走咗咯，你哋話好唔好笑先？

(眾互望，議論紛紛)

朱利安 嘩，不過都唔夠呢個好笑，肥佬平喺美國判監三年。有網民就擔心佢三年之後放返出嚟容乜易被抑鬱呀，話要發起一人一封求情信求法官判佢終身監禁喎，吓啲網民真係醒呀。

(眾互望，議論紛紛，會員逐一起身安靜離開)

朱利安 呀，呢個任生活多謝美國幫佢哋手機公司免費宣傳，合約仲多過之前添喎，嘩，免費宣傳咁正，咁真係要拉多幾個喇。(最後一個會員離開，二女喝止主席)

B 朱利安! 你知唔知我哋 in 咗幾耐先 In 到呢班人呀? 你唔駛半分鐘同我趕走晒佢哋?!

A 中學生可唔可以唔好咁政治化呀，朱利安? 外面個世界已經好 heavy 啦，所以我哋先至搞呢個會等大家笑吓，輕鬆吓，唔好咁多精神病呀，抑鬱呀，而家我畀你搞到好抑鬱囉!

B 係囉，成日都講.....

A (A+B:) 政治政治!!

A, B (二女疊聲罵朱利安，朱利安終舉手示停)

朱利安 (微笑) 我冇變過，一路以嚟我都將我關心嘅嘢同大家分享，只不過以前我關心嘅嘢係你哋關心嘅嘢，而家我關心嘅唔係你哋關心嘅嘢。但係我真係好多謝你哋幫我.....

A 哎呀!

B 仲駁嘴喎!

A 我地都係想個會好啫!



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

(二女疊聲再罵)

A 好! 我都唔再留喺度，我去女神學會都唔返嚟!

B 咁我都走喇，我去人哋泰國文化研究學會，唔想再理你呀!

A 我同你講，我去追星學會都有咁翹呀! (往台右 EXIT)

朱利安 Law...

B 我去公益少年團做義工都唔要聽到你把聲呀! (往台左 EXIT)

朱利安 兩樂... (倒下貼地)

(B 折返)

B 本來我買咗兩包鹹爆谷，而家我自己食晒佢! (台左 EXIT)

朱利安 唔好呀!

(lx change, follow spot 打在 朱利安身旁的空白，朱利安爬到 follow spot 照射的位置，兩秒後 follow spot 再度移離，朱利安再追著 follow，爬進光裡)

朱利安 唔通連支 follow 都唔鍾意我?

(follow spot 再度移離，朱利安再追著 follow，爬進光裡)

朱利安 今日個個都 unfollow 我，連支 follow 都要 unfollow 我!!

(燈暗)

Scene 2

(台右燈亮，女神學會)

(四位女神正韓風熱舞，女 A 嚴重跟不上，漸漸改跳自己的舞蹈，四女神仇視她，A 逃走) (燈暗)

(台左燈亮，公益少年團)

(B 扶婆婆坐下)

B 李婆婆呀，我哋公益少年團今日嚟探訪你哋啲獨居長者呀。